

18988 -  
- 18989



IBRICA  
VJAGELL  
LOVIENSIN

Mag. St. Dr.

18





✠   ✠   ✠

CONSTITVTIONES  
Secundi  
GENERALIS CAPITVLI  
MIECHOVIEN:

ORDINIS CANONICORVM RE-  
gularium Custodum S. Sepulchri Domini  
Hierosolymitani.

S V B

*Illustriss: & Reuerendiss: Domino,*

D. MATTHIA LVBIENSKI

DEI ET APOSTOLICÆ SEDIS GRATIA  
EPISCOPO CHELMENSI, AC PRÆPOSITO GENE-  
rali Miechouien. die XVI. Mensis Iunij, Anno  
Dñi, M.DC. XXV. celebrati,

*Et à Sede Apostolica vnâ cum prioribus Superioris  
Capituli Statutis approbata.*



CRACOVIAE,

Ex Officina Typographica Francisci Cæsarij,  
Anno Domini, 1627.





## APPROBATIO.

**E**GO Sebastianus Nucerinus Ecclesie Cathedra-  
lis Crac. Concionator Ordinarius, CON-  
STITUTIONES istas CAPITVLI GE-  
NERALIS, Patrum Ordinis Custodum Sepul-  
chri Domini Hierosolymitani, ab Illustriss: & Reue-  
rendiss: Dño, D. MATTHIA LVBIEN-  
SKI Episcopo Chelmeñ. eiusdem Ordinis Preposito  
Generali, Anno 1625. Capitulariter conscriptas vidi  
& legi: ac ut pro bono & obseruantia Religionis sub  
Regula S. Augustini Doctoris Ecclesie Maximi mili-  
tantis, prelo in lucem ederentur, lubens, tanquam  
Censor librorum in Diocesi Crac. assensum prebui.  
Die 1. Febr. Anno 1627.



189895 a

IN



## IN STEMMATA.



**D**VM caput hoc Vri cernis, cur ense resectum?  
Istaquē cur facies, sanguine tincta rubet?  
Symbola sunt mentis, sunt corporis, hæc docet Ensis,  
Consilium monstrat, pace ferente modum.  
Est Virtutis opus, pietatis, religionis,  
Præmia LVBIENSCI, talia iusta tenent.

Fr. ALBERTVS SLECKI,

EIVSDEM ORDINIS PROFESSVS

Art. & Philosoph. Baccalau.

A 2

PRÆ-





# P R Æ F A T I O

*Ab Illustriss. ac Reuerendiss. Domino,*

**D. MATTHIA LVBIENSKI  
EPISCOPO CHELMENSI,**

*Et Præposito Miechouiensi, Capitulo  
Generali præmissa.*

**H**TSI non dubito PATRES  
Reuerendi, plerosque vestrum  
non tantum mirari, sed for-  
tasse etiam permolestè ferre,  
quod adeò difficili tempore, in  
tantâ presertim rerum omnium penuriâ, & iti-  
neribus maiori ex parte, à pestiferâ lue impedi-  
tis, hoc Generale Capitulum indicendum, &  
Fraternitates vestras, ad illud conuocandas in  
animum induxerim; sed posteaquàm grauissi-  
mas eius rei causas cognoscent, & mirari desi-  
nent, & hoc meum institutum æqui boniq; con-  
sulent. Nam ut silentio præteream, quod Con-  
stitu-

## Præfatio Præpositi Generalis.

stitutionibus Ordinis nostri celebratio Capitu-  
li Generalis, singulis trienniis præscribatur  
(quanquam ne id quidem temerè est negligen-  
dum) calamitates certè, quæ his proximè præte-  
ritis temporibus Religionē nostram grauissimè  
afflixerunt, non tantum id requirere, sed etiam  
quodammodò necessariò efflagitare videntur.  
Cesi sunt, proh dolor, & in seruitutem barbari-  
cam abducti, in Prouincia Russiæ aliquot Fra-  
tres nostri, templa ibidem expilata & polluta,  
ædes tam sacre quàm profane exustæ, possessio-  
nes deniquè Ecclesiarum nostrarum, iteratis  
Tartarorum incursionibus accise, & ad sum-  
mam inopiam redactæ. Iam verò quis sine la-  
chrymis commemorare potest, quod primò in  
eadem Russiæ Prouincia, deinde verò in hoc ipso  
Monasterio crudelis mors, adeò virus suum  
pestiferum, in membra Religionis nostræ exe-  
ruerat, ut meritò cum Propheta Misericordias  
Domini, quod non omnes eadem plaga simus  
consumpti, enarrare debeamus. Siquidem hoc  
necdum integro biennio, ultra viginti Fratres,

Constit.  
Cap. Gen.  
II.  
De officio  
Præpositi  
Generalis.



Præfatio

Et quidem ferè omnes pestiferâ aurâ extinctos, ex hac nostrâ Congregatione amisimus; unde etiam numerus eorum, adeò est diminutus, ut non tantùm in particularibus Residentiis, ab hoc Monasterio dependentibus, sed ne in ipsa quidem hac Principali Ecclesia ad munia Ordinis obeunda sufficientes operarios habeamus. Et quanquam non diffidamus fore, ut Divina Maiestas, pro sua singulari providentia, quam circa hanc Congregationem nostram à Quingentis propè annis gerit, defectum hunc breui suppleat, Et ut pro Patribus nobis nascantur filij, benignè provideat, prout iam eius rei non exigua initia facta esse, magnâ cum voluptate nostrâ conspiciamus; quia tamen eadem Divina Maiestas, arcano suo consilio, vult nos esse gratiæ suæ còoperatores, ut non abs re quispiam dixerit, unâ cum Deo mouendas esse manus, conveniens Et propè necessarium esse censemus, ut nos ad Divina consilia, nostra etiam humana adiungamus, Et inuocato Dei auxilio, rationes resarciendorum damnorum per calamitates superius

Præpositi Generalis.

perius recensitas acceptorum, in hoc presenti confessu ineamus. Iam verò cum non tam in Copioso Fratrum numero, quàm in recto ordine status, Et perfectio cuiuslibet Religionis consistat, non minori curæ nobis esse debet, ut hic quoq, Regularem disciplinam non nihil vacillantem, ne dicam, magna ex parte collapsam, communibus sententiis Et studiis restaurare, ac nostrum hunc non minùs antiquissimum, quam nobilissimum Ordinem, pristino nitori, Divinâ cooperante gratiâ, restituere, pro viribus contendamus. Nam etsi nobis ad vitam rectè Et regulariter instituendam Sanctissimus Legifer Et Patriarcha noster, in suâ quàm professi sumus Regulâ, sufficientem lucem præferat, Et Constitutiones tam Antecessorum nostrorum quàm etiam nostræ, expeditam eius rei viam nobis demonstrent; quia tamen res humane adeò sunt fluxæ Et instabiles, ut nisi indies novis subsidiis fulciantur, facilè à suo statu decendant, Et in peius ruant; opera precium nos factururos existimamus, si in hoc Capitulo veterem

Regula



### Præfatio

Regularis discipline vigorem, nouis legibus excitemus, & ad diligentiorē deinceps Constitutionum nostrarum obseruantiam nosmetipsos inuicem seriō cohortemur. Et hæc quidem præcipue sunt causæ, quibus inducti Fraternitates vestras, hūc aduocandas, hancq̃ue Generalem Congregationem, licet iniquiori hoc tempore, peragendam esse instituimus. Hoc solum itaq̃ restat, ut & Fraternitates vestre huic piæ & necessarie intentioni nostræ, pro suo erga rem communem zelo, voluntates suas accomodent: & ea, quæ ad hoc negotium ex antiquo Religionis nostræ instituto, ritè & debitè peragendum pertinent, promptè & fideliter in medium afferant, Deumq̃ omnium bonorum authorem, unâ nobiscum precentur; ut nobis recta & salutaria consilia suppeditare, atq̃ hoc diuinum opus tractantibus presenti numine & auxilio suo adesse dignetur: Deus illuminet vultum suum super nos & misereatur nostri, ut cognoscamus in terra vias eius, & semitis eius insistamus. Etsi verò nihil hic decerneretur statuereturque

quod

### Præpositi Generalis.

quod non prius communis omnium vestrum consensus approbauerit, quò tamen hæc nostra consilia expeditiorem progressum & exitum habeant. Nos ea quæ in hoc Capitulo pro utilitate huius Ordinis proponenda & tractanda esse censuimus, certis Capitibus comprehensa, & scripto iam connotata, pro communi omnium vestrum trutinâ, perlegi mandabimus. De quibus, ut Fraternitates vestre intentionem suam liberè explicent, & animorum suorum sensa fideliter aperiant, benignè inuitamus.



### Proœmium.

**E**A EST RERVM HVMANARVM continua vicissitudini subiectarum conditio, ut etiam illa, quæ semel rectè cæpta, & aliquandiu in suo statu conseruata sunt, successu tandem temporis, nisi crebris, illisq̃ efficacibus remediis instaurentur, facile à primo decidant vigore; nocitura enim herba sæcundius succrescit &

B



Proëmium.

scit & nullo etiam negotio fertilissimos occupat agros; salutaris verò, culturâ indiget, nec facile radices agit, aut se ad vicina extendit, nisi indefessus labor accesserit. Proinde cum hoc idem, quoque in ordine nostro, tot antea actis Capitulis, ad Regularem disciplinam ritè seruandam non mediocriter instructo fieri animaduertamus, multosq; videamus, in exequendis Constitutionibus, partim temporum iniquitate partim etiam nostrâ negligentia irrepsisse defectus; operæ pretium nos facturos existimamus, si in hoc presenti Capitulo, non tam noua Statuta condere, quam potius antea prudenter sancita debite executioni (sine qua frustrâ leges conduntur) demandari Diuinâ ope suffulti pro viribus nostris elaboremus; & hæc quæ hîc connotabuntur, per medium Monitorij, seu Directorij, ex præteritis Constitutionibus collecta, Fratribus nostris præ oculis ponamus.



CAPVT



CAPVT PRIMVM.

De mutuâ inter Fratres charitate innouandâ, ac confirmandâ.



QVemadmodum Sanctus Patriarcha ac Legislator noster, à Charitate, tanquam firmissimo Spiritualis ædificij fundamento, lucam sanctam orditur Regulam; ita nos (licet indigni) eius vestigiis inhærentes, hoc præsens Directorium nostrum, non nisi à mutuâ inter Fratres Ordinis nostri, quasi de nouo excitandâ, & confirmandâ Charitate inchoandum esse existimamus; quod quidem eò libentius facimus, quò grauiora ex defectu mutui inter Fratres amoris, in Ordine, tam in spiritualibus, quam in temporalibus mala irrepsisse conspiciamus. Hinc enim prouenit in primis vetita domesticorum defectuum coram extraneis, ac sæcularibus personis, (quod sine graui audientium scandalo, & Religionis detrimento fieri nequit) propalatio, cum tamen Charitas operire debeat multitudinem peccatorum. Hinc debita & à Sanctis Patribus, nec non Oecumenicis Conciliis,



### *Constitutiones*

ciliis, omnibus tam Regularibus, quam Sæcularibus Clericis diligenter commendatæ hospitalitatis, sequitur contemptus; hinc deniq; lites, odia, rancores, ac dissensiones inter Fratres exortæ, cum continuo appetitu vindictæ diu fouentur, ac vera & fraterna reconciliatio non facile admittitur.

Quorum quidem omnium malorum cum inter alia priuata ac clandestina vnius Fratris ad alterum literarum transmissio, non exiguum (experientia teste) sit seminarium, serio prohibemus, ne in posterum Fratres nostri, tam extra quam intra Conuentum degentes, literas sine scitu Superiorum suorum pœnes quos pro tempore manent, & non nisi communi sigillo obsignatas, ad quascunq; personas (præterquam ad Reuerendissimum Generalem & Custodem Ordinis, ac ad suum Prouincialem) mittere, ab aliisq; vicissim easdem accipere præsumant. Cuius Statuti transgressio Carceris pœnâ in posterum coerceri debet.

Et quia gratitudo ipsa exigit, vt Fratres Ordinis nostri, à sua communi parente, Conuentu videlicet Miechouiensi, Beneficiis dotati, (quorum non Dominos sed potius temporaneos administratores se esse scire debent) eidem in occurrentibus necessitatibus subueniant, ideo optare-

mus,

### *Capit. Generalis Miechouiensi.*

mus, vt ex ipso erga Rem communem zelo, sponte ac liberaliter, hoc subsidium Charitativum quoties necessitas exigit, suppeditare pro posse suo non grauentur, & quod aliqui (non sine notabili Conscientiæ grauamine, & ad restitutionem obligatione) propinquis, aut aliis extraneis personis, ultra debitum eleëmodynæ modum, vel in exquisitiorem vestitum, quàm fert illorum vocatio, aut etiam in lautiora conuiuia impendunt, hoc potius Monasterio, pro vsu Fratrum in eo residentium, mutui amoris atq; gratitudinis ergò offerant.

Porro vt iidem Beneficiati habeant, in quo suam immediatam à Conuentu Miechouiensi dependentiam protestentur. Volumus, vt siue Capitulum Generale tempore debito celebratum fuerit, siue non, viciniore saltim semel in anno, remotiores verò ad minus intra triennium, pro temporis oportunitate Conuentum Miechouiensem visitent, Exemogelefim delictorum ibidem facturi, & rationem prouentuum suorum, iuxta præscriptum Constitutionum reddituri, ac Nos, & Successores nostros, de statu Beneficiorum suorum informaturi. Deniq; hæc eadem Charitas Fraternalis à nobis exigit, vt quem viuus amorem præstitimus, eundem quoq; si non maiorem, vita functis Fratribus nostris, exhibere studeamus.

B 3

Constit.  
Cap. Gen.  
II.  
De officio  
Præposito-  
rum & Pa-  
rochorum



deamus, ipsorumq; animas, ad primam obitus alicuius Fratris, per Custodem ad Prouinciales, & per hos, ad suos Comprouinciales denunciationem, cum aliis piis operibus, tum vel maxime (iuxta præscriptum Constitutionis decimæ Capituli Tertij Generalis) trino Missæ sacrificio per quemlibet presbyterum expediendo, absq; vllâ procrastinatione, iuuare non grauemur, memores illius Euangelij quod quali mensura mensi fuerimus, tali vicissim remetietur nobis.



## CAPVT SECVNDVM.

### *De proprietatis vitio extirpando & Paupertate sancta resuscitanda.*

**C**VM Proprietas inter alia graua quæ cuiuslibet Religioni, in qua pedem fixerit, adferre solet, incommoda, certissimum sit fraternæ charitatis excidium; quomodo enim illic societatis, ac inuiolatæ rerum omnium communionis iura seruari possunt, vbi Meum. & Tuum, (quæ verba omnium discordiarum sunt seminarium) dominantur; ideo nos quoq; dum pulcherrimum mutuæ charitatis in Ordine nostro ædificium construere cupimus, de Paupertate Sancta, quæ  
totius

## *Capit. Generalis Miechouien.*

totius Regularis disciplinæ firmissima basis est & fundamentum, magna ex parte iam collapsa, iterum resuscitanda, & restauranda seriò cogitare, & illa omnia quæ de ea in Constitutionibus proximè præteriti Capituli Generalis laudabiliter sane, ac sufficienter ex communi Theologorum ac Canonistarum sensu, præscripta sunt, debitæ executioni mandare, eoq; ipso communi salutis nostræ, quæ in proprietatis vitio procul dubiò periclitatur, consulere debemus. Quod vt Fratribus nostris, eò ordinatiùs & efficacius explicemus, placuit hoc Caput in aliquot Puncta distribuere, quibus nonnulla Paupertatis in Ordine nostro seruandæ impedimenta ab aliquibus illorum perperam allegari solita, & statim contra eadem remedia breuiter proponuntur.

### *Punctum Primum.*

**E**A est, perniciosi huius vitij Proprietatis scilicet, natura, vt vbi semel firmas egerit radices, non nisi summo cum labore, ac difficultate, eliminari possit. Vnde nos quoq; licet nihil magis optaremus, quàm vt aurea illa, ac iuxta Regulam quam professi sumus, debita rerum omnium, non tantum in victu, sed etiam in vestitu, aliisq; necessariis, Communitas prout in aliis ordinatis, sic etiam in hac nostrâ Religione vigeat, neq;



### *Constitutiones*

neq; quisquam Fratrum nostrorum vsurpet sibi aliquid proprium, sed sint ipsis omnia communia: quia tamen hoc malum adeò longo tempore in Ordine nostro inualuit, vt non nulli ex Fratribus nostris diuturna consuetudine, quæ potius corruptela dici debet, se excusatos esse à reatu huius abominandi vitij falso opinentur; idcirco hoc illis diligenter ad præsens inculcandum esse duximus, vt hunc errorem seriò ex animo deponant, neq; amplius eiusmodi abusus tutos se esse in conscientia existiment. Si quidem non quàm longo tempore, sed quàm rectè & licitè aliquid alicubi seruetur, attendi debet.

### *Punctum Secundum.*

**P**Ræter diuturnam, ac longo tempore inueratam Proprietatis consuetudinem, seu potius abusum, prætextitur & alia seruandæ in Ordine nostro Paupertatis excusatio, quòd videlicet non nulli è medio Fratrum nostrorum, nescimus quo innixi fundamento, existimant se non adeò strictè quemadmodum alias Religiosorum Familias, ad votum Paupertatis seruandum ex vi instituti sui obligari; sed reuera grauissimè falluntur, cum Religiosus, quàm Religiosus, cuiuscunq; Ordinis institutiue sit, à voto Paupertatis seruando nequaquam, liber esse possit comuni Theologorum

### *Capit. Generalis Meechouien.*

rum sensu, hoc ipsum approbante: Fatemur quidem, quod omnimodam, ac perfectam illam rerum ad vsum pertinentium amotionem, status noster (cui ex vi ipsius instituti cura animarum adiuncta est) ægrè admodum patiatur, nihilominus tamen in ipsomet necessariorum vfu debitam à voluntate, ac liberâ Superiorum dispositione (iuxta modum in Constitutionibus præscriptum) dependentiam requirimus, ita, vt Fratri nostro (nullum præsertim habenti Beneficium) sine expresso, vel saltim (in rebus præsertim leuioribus) implicito Superiorum consensu, neq; quidquam ab aliquo, etiam doni, aut eleëmofynæ nomine accipere, neq; vicissim cuiuspiam aliquid dare liceat. Hinc illæ mutuae donationes, permutationes, emptiones, venditiones, & quocunque alio prætextu pecuniarum, aliarumq; necessariorum rerum acquisitiones, ac quiuis cæteri contractus, qui priuatim & clandestinè, non sine graui dolore nostro & sanctæ Paupertatis iacturâ inter nonnullos Fratres nostros, exercentur, tanquam illicitè, & sacris Canonibus, Regulæ, & ipsimet Paupertatis naturæ contrarij præsentis statuto damnantur, & ne in posterum fiant seriò prohibetur. Quod si verò aliquis, (quod absit) eiusmodi proprietarius repperitus fuerit, præter alias grauissimas pœnas, ea de re in Constitutionibus sancitas, quicquid priuatim,

Constit.  
Cap. Gen.  
II.  
De officio  
Vicariorū.

Lib. 3.



### Constitutiones

Constit.  
Cap. Gen.  
II. Cap. I.  
& 3.

uatim, & sine scitu Superiorum acquisierit, hoc totum per Superiorem ab eo à primâ notitiâ amoveatur, & in vsum communem redigatur, ac insuper eiusmodi votifragus, vnâ cum illâ re celatâ vnâ vicē, tempore prandij ad fornacem hypocausti communis ieiunus (iuxta veterem huius Ordinis nostri disciplinam) sedere teneatur; Si verò extra Conuentum in particulari aliquo loco manserit, per prouincialem, vel etiam per suum superiorem, simili poena irremissibiliter puniatur.

#### Punctum Tertium.

Const. VI.  
Cap. Gen.  
III.

**N**ON quidem nos latet, sanctos Canones à Superioribus Religionum requirere, ne dum suos subditos ad seruandam Paupertatem inducere satagunt, isti vicissim illorum accusent negligentiam in prouidendis necessariis; verum quia præter bona ad Mensam Fratrum spectantia, (quæ rectè administrata non tantum pro victu, sed etiam amictu facile sufficere possent) certi etiam redditus pro vestiaria antiquitus in Constitutionibus præteritis sunt assignati, & paulo antè per Nos etiam notabiliter aucti, & successu temporis per Dei gratiam augendi; idcirco Fratres nostri non tam de sufficienti necessariorum prouisione conqueri, quàm potius de ordinata reddituum per suos officiales administratione sedulo cogitare, illudq;

### Cap. Generalis Meechouien.

illudq; prouidere debent, vt eiusmodi vestiarios, & Dispensatorem eligant, qui in officio constituti, ita rem Oeconomicam procurent, vt non tantum promptuarium, sed etiam vestiariam, omnibus necessariis refertam habeant, & cum scitu Patris Custodis quod cuiq; necessarium sit, dare non differant. Et quoniam interim certus atq; sufficiens pro asseruandis rebus necessariis locus non habetur, dabimus operam, vt quam primum vnâ cum hospitio, (quod etiam in Conuentu adhuc desideratur) rectè ordinata ac disposita habeantur.

#### Punctum Quartum.

**H**VC accedit & illud, quod pleriq; Fratres nostri præsertim priuati adeo nimis diligentes ac solliciti sint in comparandis rebus necessariis, vt dum priuato studio atq; industriâ necessaria procurare satagunt, en illi superflua, quæ neq; ipsimet tutâ conscientiâ penes se retinere, neque etiam Superiores hâc in parte cum iisdem dispensare possunt, colligunt, atq; ita sub prætextu prouisionis necessariorum, in casum præsertim infirmitatis, (cui etiam tam ab Antecessoribus nostris quàm à nobis sufficienter est prouisum) non modò statui Religioso minus competentes pecuniæ summas corradunt, verum etiam de iis tanquam

C 2 pro-



### Constitutiones

proprio (vt ipsimet dicunt) labore & industriâ comparatis, iuxta suum arbitrium disponere præsumunt. Cum tamen Religiosus, quicquid acquirit non sibi, sed Religioni acquirat, ac proinde quicquid habet, hoc totum liberæ Superiorum dispositioni resignare teneatur. Quare cum hoc pestiferum virus in Ordine nostro, indies magis serpat; Statuimus, vt Vicarij, alijq; Fratres priuati, quibus procuratio alicuius Beneficij demandata non est, in colligenda & retinenda pecunia, eiusmodi moderationem adhibeant, vt in posterum quicquid ex Eleemosynis, alijsq; obuentio- nibus collegerint, id statim totum, iuxta præscriptum Constitutionum Superiori suo præsentare, & vel eidem ad seruandum tradere, vel cum licentia ipsius penes se asseruare, eamq; pecuniam non nisi cum scitu, & permissione eiusdem Superioris partim in vsus proprios conuertere, partim in casum necessitatis asseruare, sub amissione eiusdem pecuniæ, alijsq; poenis contra proprietarios sancitis, sint obligati. Vbi verò in Conuentum Miechouiensem redierint, non prius res extra Monasterium, pro vsu comparatas, in cellam inferre audeant, quàm indicem earundem fideliter conscriptum, Patri Custodi reddiderint, sufficientemq; omnium perceptorum, ac expensorum rationem fecerint.

Constit.  
De officio  
Vicariorū.

Pun.

### Cap. Generalis Miechouien.

#### Punctum Quintum.

Neque hic quoq; silentio prætermittendus est quorundam Fratrum nostrorum abusus, qui contra Constitutiones ordinis grauissimè id prohibentes, res post obitum Fratrum derelictas, præsertim verò libros (qui tamen in quibusdam nobilioribus præsertim locis, vbi aliquot Fratres simul inhabitant, cum scitu, & consensu Reuerendiss. Domini Generalis, pro vsu ipsorum ibidem pro tempore manentium retineri poterunt) vestes, pecunias, alijsq; ex antiqua ordinatione ad Conuentum Miechouiensem spectantia, motu proprio, & nonnunquam clandestinè distrahunt, illaq; priuatim sibi vsurpare non verentur. Quod quidem cum sine graui propriæ conscientiæ, & communitatis detrimento, ac ad restituendum obligatione fieri nequaquam possit, Constitutiones præteritas ea de re prudenter sancitas, in toto reasumimus, & vt debitæ mandentur executioni, auctoritate nostra ordinaria seriò præcipimus, in transgressores grauiter animaduersuri.

Constit.  
Cap. Gen.  
I. Cap. V.  
& Constit.  
Cap. Gen.  
II. lib. 3.  
Cap. 2.

Constit.  
Cap. Gen.  
II. lib. 3.  
Cap. 2.



C 3

CA.





CAPVT TERTIVM.

*De rectâ Fratrum iuniorum institutione  
& Studiorum tractatione.*

**Q**uantum momenti, in quolibet Religioso Ordine, in rectâ Tyronum institutione, (quæ est præcipuum totius Regularis disciplinæ fundamentum) positum sit, vel ipsamet experientia nos docet. Quid enim mirum, si Professi, maiore veluti obtentâ libertate delinquant, quando circa Nouitiorum institutionem, non ea quæ par est, diligentia habetur, dum & minus idonei ad Nouitiatum citrà omnem plane delectum, (& nonnunquam ad importunam priuatorum instantiam) admittuntur, & admissi, quando vel maximè in assiduo virtutum ac literarum exercitio occupari deberent, otio delitescere permittuntur? Quocirca cum nihil magis optemus, quàm vt hæc Congregatio nostra, maiores indies in pietate ac doctrinâ aliisq; virtutibus Religiosam vitam concernentibus, progressus faciat, id autem, vt dictum est, à rectâ Tyronum institutione, vel maximè dependeat. Statuimus, vt hoc præsertim tempore quo numerus Fratrum adeo dimi-

*Cap. Generalis Miechouien.*

diminutus, maximè per ordinatam Nouitiorum susceptionem est supplendus, non nisi eiusmodi Magister Nouitiorum capitulariter eligatur, qui maturo iudicio, & prudentia præditus, Instituti Regularis, & ipse sit amans, & eiusdem in animis aliorum inferendi feruens zelator, & qui non nudâ tantum pietate, & religione, sed etiam doctrinâ & prudentiâ sufficienter instructus, existat. Quare illius inprimis partes erunt, seriam in admittendis pro Nouitiatus disquisitionem facere, ac omnes defectus, in Constitutionibus circa susceptionem Nouitiorum expressos, diligenter indagare, neq; quicquam coram Reuerendiss. Generali & Capitulo celare.

Porro quemadmodum ipsa Nouitiorum susceptio Capitularis, & publica esse solet, ita etiam Habitus Ordinis nostri assumptio, non priuata (prout hætenus abusu quodam fieri consueverat) sed publica iuxta præscriptum Constitutionum esse debet. Nouitius verò non prius Habitus induat, quàm generalem peccatorum Confessionem præmiserit; Expedit autem (idq; propter aliquod reuelationis sigilli periculum) vt non ipsemet Nouitiorum Magister, sed potius aliquis alius maturus atq; idoneus Presbyter, pro excipiendis Fratrum iuniorum Confessionibus, capitulariter deputetur.

Neque

Lib. 3.  
Constit.  
Cap. Gen.  
II, Cap. 2.



### *Constitutiones*

Neque verò sufficiat, seria in admittendis Novitiis disquisitio, nisi eò magis accurata ac diligens, post admissionem probatio, ac institutio accesserit. Proinde idem Novitiorum Magister, quò facilius Fratres curæ suæ commissos ad pietatis, ac religionis studium incitare ac inflammare possit, dux ipse illis, ad omnem virtutem esse, iisdemq; non tantum verbo, sed etiam exemplo præluere debet, ut in omni actione, vitâq; ipsius, habeant iuniores, quod tuto & laudabiliter imitari possint. Ante omnia vero, quod singulari prudentia & dexteritate indiget, curabit, ut vniuscuiusque naturam, ingenium, mores, & propensiones, optimè sibi perspecta, ac cognita habeat, quò facilius diuersarum naturarum, atque complexionum morbis, diuersa quoq; remedia adhibere possit. Poterit autem facilè mores, & naturam cuiuslibet cognoscere, partim ex spontanea per ipsum Novitium proprii defectus (quod omnes tam seniores, quam iuniores Fratres, coram Superiore in posterum facere non negligent) coram se detectione, partim ex certa sociorum eiusdem conuictus delatione; partim deniq; ex longa observatione & experientia, in omnem partem suæ curæ commissos, nunc laudibus, nunc obiurgationibus, nunc penitentiis, nunc præmiis versando. Præcipuè vero Orationis, tam vo-

calis,

### *Cap. Generalis Miechouien.*

calis, quàm mentalis crebrum exercitium, quotidianam Missæ auditionem, frequentem Conscientiæ exomologesim, ac Sacramentæ frequentationem, (quod præter omnia festa solennia, quolibet Dominica prima Mensis, ex præscripto Concilij Tridentini facere tenentur) ipsis commendabit.

Adhæc, cum Magister Novitiorum sit ipsorum director, dabit omnem operam, ut Novitij, antiquos, ac sæculares exuant mores, modestos verò, maturos, ac Religiosos induant; Specialiter verò, oculi illorum sunt domandi, ac tanquam iniecto freno cohibendi, ne in omnem partem excurrant, atq; adeò nocitura hauriant; præsertim verò, quando in locis publicis, inter homines versantur; Incessus illorum sit constans, moderatus, qui nec tarditate ignauiam, nec citatiore progressu leuitatem mentis testetur, neq; in variam partem libratus fastum denotet. Nihil deniq; quod sæculum, quod aulæ mores, quod iactantiam, & fastum sapiat, quodq; aliquid minus decens, atq; honestum sit, in moribus, atque actionibus ipsorum, deprehendatur. Affluescant præterea piis colloquiis, omnemq; sermocinationem diuinis condiant rebus, & non nisi Latino ad inuicem vtantur idiomate; Caueant risum profusorem, verba procacia, dicteria, sarcasmos,

D                      fabu-



fabularum, variarumq; rerum narrationes; Insuper quisq; illorum, in suâ cellâ (exceptis recreationum aliarumq; communium occupationum horis) se contineat, nec vnus alterius, non tantum Professi, sed ne Nouitij quidem, cellam, sine scitu Magistri, visitare præsumat. Quod si Magister aliquem ex Nouitijs minus aptum ad Regularem obseruantiam aduerterit, & in eo aliquos grauiores naturæ, vel morum, vel etiam doctrinæ defectus, in probatione deprehenderit, admo-  
neatur maturè Patrem Custodem, vt talis nouitius, qui non magnam spem de se Religioni pollicetur, è Conuentu dimittatur. Periculosum enim & Religioni noxium esse solet, aliquem minus habilem ad Ordinem suscipere, & multò periculosius eiusmodi susceptum diutius retinere, cum res hæc in vniuersi corporis vergat interitum, plusq; vnus sæpè improbitas nocuenti, quàm plurimorum probitas emolumenti Religioni adferre consueuerit.

Et quia effrenata quorundam iuniorum insolentia eò processit, vt etiam grauissimis poenis in Constitutionibus assignatis, à frequenti, illaq; furtiuâ è Monasterio egressione facillè coerceri, ac retrahi non possint, proinde vt huic tanto malo, omni meliori modo obuiam iri possit; Statuimus, vt præter pænas in Constitutionibus Ordinis

Constit.  
De officio  
Magistri  
Nouitiorum

nis determinatas, quicumq; in posterum eiusmodi crimen commiserit, Nouitius quidem statim eiiciatur, Professus verò à susceptione Ordinum, per vnum integrum, si verò id secundo fecerit, per alterum annum suspendatur, idq; in Actis Capitularibus (quæ deinceps accuratius per P. Custodem, vel ab eo designandum, describi debent) memoriæ causa notetur. Quod si ne ista quidem curauerit, in subterraneum carcerem, per aliquot menses ibidem detinendus, soloq; pane & aquâ sustentandus detrudatur, etsi adhuc contumax esse perrexerit, consilio capitulariter cum Consiliariis communicato, ab rasis Ordinis insignibus è Conuentu, (ne contagione pestifera alios inficiat) eiiciatur. Iam verò cum inter cætera Religionis adiumenta, Studiorum exercitium meritò numerari possit, si quidem, vt Studia comitantur virtutes, ita è conuersò intermissio eorum, otium (quod certissima vitiorum omnium est origo) parit; Idcirco, vt & Constitutionibus nostris ea de re sancitis, satisfieri, & ipsimet vtilitati, ac necessitati Ordinis, consuli possit. Volumus; vt præter Perorationes à Fratribus iunioribus diebus festis ad Mensam haberi solitas, Lectiones hætenus, ob immaturam doctiorum nonnullarum personarum mortem, intermissæ, absq; vllâ procrastinatione, iterum reassumantur, etsi in

Constit.  
De officio  
Magistri  
Nouitiorum



### *Constitutiones*

præsentia, ob inopiam graduatorum Fratrum, duæ commodè haberi non poterunt, adminus una, siue in sacris, siue in profanis, (exercitio pomeridiano, cum repetitione lectionis matutinæ subsequente) instituatur. Ne verò in proferendo sermone Latino Fratres nostri in posterum turpiter errent, singulis feriis quintis, præceptis Accentus, tam Regularis quàm Grammaticalis informantur. Insuper cum hætenus aliquot annorum spatio peste cum alibi, tum potissimum Cracouiæ grassante, nullus fermè Fratrum, contra antiquam, & laudabilem consuetudinem, nec non contra ipsam piæ Foundationis exigentiam in studiis Academia Cracouiensis manserit. Ordinamus, ut (nisi aliquod legitimum obstiterit impedimentum) pro commutatione hyemali proximè ventura, bini Fratres aptiores, Cracouiam mittantur, nec faciliè postmodum à cæptis studiis, donec iustum in eisdem fecerint progressum abstrahantur, sumptum partim ex ordinatione Reuerendiss. olim Thomæ de Ilkus Antecessoris nostri, partim ex prouentibus Mensæ communis habituri. Ut autem quod à multo tempore, cum à Prædecessoribus nostris, tum & à nobis in votis habetur, ipsaq; Ordinis necessitas id exigit, tandem aliquando auspice Deo, de Fratribus Romanam mittendis Constitutio saltim aliqua ex parte

exc-

### *Cap. Generalis Miechouien.*

Executioni demandetur; Nolumus rem adeò honestam, ac summè necessariam ulterius differre, sed iam ex Capitulo præsentis, vnum è medio (cum pro duobus hoc difficili tempore sufficientes sumptus nequaquam haberi possint) videlicet R. D. Alexandrum Pinczouium Artium & Philosophiæ Magistrum, Romam studiorum, nonnullorumque Ordinis nostri negotiorum, causa destinamus, ipsique pro nostro erga bonum Ordinis quali quali zelo, præter Ducentos decem florenos, ex censu reemptionali in villa Buk recentè empto, (idq; post venditionem capitulariter factam prædij in Raczlavvice, obligationem pensionis, pro Studiis Romanis habentis, per Præpositum Wrocimouiensem, ob desolationem ipsius, Conuentui resignati) quotannis pendi solitos, ex redditibus nostris florenos aureos sexaginta offerimus. Confisi reliquorum quoq; Fratrum nostrorum Beneficiatorum præsertim, debitam liberalitatem, in re tanti momenti minimè defuturam, quod ut eò promptius faciant, paternè eos monemus, ac inuitamus.





## CAPVT QVARTVM.

*De Ecclesiasticis Officiis ritè peragendis  
& cultu diuino promouendo.*

**E**TSI ea, quæ ad debitam Sacramentorum administrationem, aliaq; Ecclesiastica munia, rite obeunda pertinent, præclare satis, ac sufficienter in antiquioribus Ordinis Constitutionibus, integris duobus libris, Capituli Generalis secundi præscripta, ac ordinata habeantur, nonnullaq; præsentì temporì, & praxi seruientia, à Nobis in proximè præterito Generali Capitulo addita sint, ita vt nihil planè, præter ipsamet sancitorum executionem desiderari videatur; tamen cum hætenus vel ipsamet experientia didicerimus, in hac Ecclesia nostra Conuentuali, quædam non secundum præscriptum earundem Constitutionum fieri, sciamusq; pro temporum mutatione, res quoq; & personarum actiones nonnunquam mutari; Proinde quo facilius Capitularia Statuta debitæ mandentur executioni, in nonnullis illorum punctis moderationem, in aliis vero additionem aliquam faciendam esse, censuimus.

Atque

*Capit. Generalis Miechouien.*

Atque in primis, quantum ad tempus Horarum Canoniarum attinet. Postulationis & ipsiusmet maioris Fratrum certò temporì in surgendo pro Matutino hætenus assuetorum, commoditatis rationem habentes, permittimus; vt tam æstiuo quàm hyemali tempore horâ primâ post mediam noctem (exceptis solennioribus diebus Festis, quibus iuxtà præscriptum præteriti Capituli, tertia post mediam noctem hora, ianuæ Ecclesiæ, pro aditu populi apertis, decantari debet) Matutinum inchoetur, Quo finito, confestim Pater Custos, vel in absentia Vicecustos, singulis diebus materiam meditationis breuiter proponat: Cui exercitio, iuniores quidem Fratres, (tempore præfestim æstiuo) in Oratorio, vnâ cum Magistro Nouitiorum, Presbyteri verò, siue ibidem simul, siue in cellis; Hyemali autem tempore, omnes in communi hypocausto, adminùs per vnum horæ quadrantem, vacabunt: Nihilominùs tamen media hora ante Primam dabitur signum pulsus, tam pro Oratione vocali, quàm pro debito corporis ornatu.

Et quia Responsoria olim à Fratribus, singulis diebus in matutino cantari solita, iam ab aliquot annis, Fratrum numero diminuto, non cantari, sed legi consueuerunt: proinde ne illa consuetudo antiqua, in decantandis Responsoriis, omninò sol-

In distribu-  
tione hora-  
rum quo-  
ad Diuina  
Officia.



tollatur, atq; hac in parte cultus Diuinus notabiliter diminuat. Statuimus, vt saltim quotiescunq; in Choro inferiori, iuxta Constitutiones Ordinis, Matutinum expediri contigerit, omnium Nocturnorum Responsorialia integrè, singulis verò diebus festis Duplicibus, & Dominicis, ad minus Tertij Nocturni, (prout etiam hætenus fieri consuevit) decantentur, reliquis verò diebus, alta & distincta voce proferantur, Cantore primum, Vicecantore secundum Chorum regente, qui iidem erunt iuxta modernam consuetudinem Psalmorum præcentores. Nonæ verò tempus, quod hætenus fuit, in continua quadam variatione, vt certum ac determinatum haberi possit, Ordinamus; vt præter illa tempora, quibus ante Summum Sacrum iuxta præscriptum Rubri Romani expediri debet, reliquis diebus, tam Festis quàm ferialibus statim post Psalmum Miserere, à prandiis processionaliter eundo ad Chorum recitari solitum, iuxta antiquam consuetudinem absoluantur.

Porro finita post prandium hora recreationis, non erit iam liberum Fratribus per Dormitorium, aliaq; loca Conuentus, absq; vrgenti necessitate deambulare, sed quisq; ad signum campanæ recta se in cellam conferret, ibidemq; ad Vesperas vsq; lectioni, alijsq; religiosis exercitiis inten-

cus

tus, sese continebit. Quod si aliquis Fratrum hanc nostram ordinationem transgredi ausus fuerit, primò quidem seueram admonitionem postmodum vnius ferculi, ac deinceps integræ coenæ priuationem subibit.

Ne autem piæ Benefactorum intentiones, in suis Foundationibus defraudentur, Sacristiano seniori pro tempore existenti, seriò præcipimus, vt citra omnem moram, omnes & singulas, tam antiquas, quàm recentiores obligationes, cum quoad Missarum, tum quoad Anniuersariorum celebrationem (iuxta moderationem in quibusdam per Nos, de consilio Illustr. Dñi Lociordinarij faciendam) tabulas ordinatè per Patrem Custodem descriptas habeat, quarum vna in Sacristia, altera verò in Communi Oratorio, in aliquo loco conspicuo perpetuè asseruetur. Quibus etiam Anniuersaria dies depositionis nostræ, sollenni officio Defunctorum quotannis obeunda, ac præterea singulis feriis secundis, vna Missa lecta pro Defunctis, ad Altare Priuilegiatum, pro anima nostra absoluenda, à Fratribus nostris, in hoc præsentì Capitulo, nonnullorum Beneficiorum Conuentui à Nobis impensorum, gratitudinis causa vltro concessa, & in perpetuum in eadem Ecclesia obseruanda, annumerari debet.

Idem nimiam eleemosynarum pro celebran-

E

dis



## Constitutiones

dis Missis aggregationem vitabit, pro acceptis verò intentioni Benefactorum, in toto satisfieri curabit. Præcauebit insuper diligenter, ut eleëmofynæ, non tantum respectu Missarum, sed etiam ratione administrationis Sacramentorum, à nonnullis Presbyteris perperam vsurpari solitæ, nonnisi in communem carbonam, in aliquo tuto Sacristiæ loco asseruandam, integrè & fideliter deponantur. Quod si aliquem contrarium facientem aduerterit, eum tanquam Proprietarium P. Custodi deferat, in quem ille, iuxta poenam in Constitutionibus præscriptam, animaduertere debet.

Constit.  
De officio  
omniū Fra-  
trum in  
Conuentu  
manentiū.

P. Custos verò, ita Ordinem Missarum diebus Festis moderabitur, ut Sacra, ab ortu solis ad meridiem propè, sine intermissione continuari possint, quo facilius, tempore quocunq; ad Ecclesiā venientes, Missam integram audire possint. Ac præterea singulis diebus, tempore præsertim æstiuo, vnum Missæ sacrificium, non multum ab Ortus solis, pro comoditate tam hospitem, quam etiam laborantium fieri curabit.

Volumus præterea, ut quotiescunq; Confessio Generalis à Fratribus Ordinis nostri, siue priuatim, siue publicè recitatur, semper post Apostolorum nominationem S. Patris nostri Diui Augustini, ad instar aliarum Religionum, mentio fiat.

Quantum

## Capit. Generalis Miehouiën.

Quantum autem ad administrationem Sacramentorum attinet; præter ea, quæ in Constitutionibus Ordinis ea de re sancita habentur, nihil amplius desiderari videtur, quàm ut Presbyteri Sacramenta administrantes, ita se gerant, prout in iisdem Constitutionibus præscriptum habetur; hoc solo addito, ut tam Prouincialibus, quàm Diocesanis Illustrissimorum Lociordinariorum Statutis, præsertim in punctis curam animarum, & administrationem Sacramentorum concernentibus, sese accommodent.

Lib. I. Cap.  
Gen. II.

Cum verò inter cætera, Pœnitentiæ Sacramentum, peculiarem quandam à Sacerdotibus exigit scientiam, atq; prudentiam, multa que eum nosse, qui hoc Sacramentum ritè administrare cupit, oporteat; Statuimus, ut præter Ordinarium Confessariorum examen, in Constitutionibus recentioribus præscriptum, Presbyteri pro excipiendis Confessionibus deputati, singulis mensibus, commodiori aliquo tempore, per P. Custodem assignando: in Quadragesima verò singulis Feriis quintis, tempore matutino, in Casibus conscientie conferentias habeant, citra tamen aliquam sigilli Confessionis reuelationem.

Constit.  
De Officio  
omniū  
Fratrum in  
Conuentu  
manentiū.

Quoniam autem Festi Dedicationis, (quod in Ordine nostro pro die Diuisionis Apostolorum celebrari solet) non tantum externi, sed etiam

E 2

nonnulli




### *Constitutiones*

nonnulli ex Fratribus nostris rationem non omnino perspectam habent, atq; id in Patronorum officio non adeò clarè expressum est, talem hìc eius rei declarationem faciendam esse censuimus; Quòd in omnibus quidem Ecclesiis Ordinis nostri, Commemoratio Dedicationis Ecclesiæ Hierosolymitanæ, eo die, qui primitus per Apostolos fuit dedicata, & postea per Godhefridum Regem, post receptam Hierosolymam repurgata, (ad instar Dedicationis Basilicæ, SS. Petri & Pauli in Vaticano, & Saluatoris in Laterano) fieri debet; sed tamen ea distinctione adhibitâ, ut in iis Ecclesiis, ubi etiam in eundem diem incidit Dedicationis propriarum Ecclesiarum, ut potè hic Miechouiæ, Stradomiæ ad S. Hedwigim, Preuorscij, Lezaïscij, & in nonnullis aliis locis, hoc Festum sollemniter & cum octaua: In aliis autem, quæ pro alio tempore peculiariter assignatas Dedicationes habent, sub officio duplici, sine solennitate tamen, ad populû, & sine octauâ celebrari debet.

Cùm autem Approbatio Officiorum Patronorum Ordinis nostri (quam nuper per Internuntium nostrum à Sede Apostolica obtinere procurabamus) in longius tempus dilata, vsus verò tantum eorum quæ antiquitûs, & ab immemorabili tempore in praxi habebantur, viux vocis oraculo eidem internuntio nostro factò permîssus sit, ideo

### *Cap. Generalis Miechouien.*

ideo quousq; Pontificia omnium & singulorû officiorum (quæ non ita pridem in ordinem redacta, ac Typis mandata sunt) Confirmatio obtenta non fuerit, omnes Ordinis nostri Fratres, ea tantum de Patronis Officia recitent, quæ ab immemorabili tempore ab Ordine nostro in vsu habita, & interruptè obseruata esse reperiuntur.



### *CAPVT QVINTVM.*

*De Regularis discipline obseruantia, & defectibus in executione Constitutionum Ordinis supplendis.*

**Q**Uod ad hanc materiam, inter alias facile primam attinet, rem minus vtilem nos facturos existimamus, si ad ea quæ de hac re, cum in ipsamet Sancti Patris nostri Regula; tum in Ordinis nostri Constitutionibus sufficienter sanè præscripta habentur, aliqua in hoc Directorio nostro veluti de nouo addere velimus. Sufficiet interim, nonnullos, illosq; minus ferendos in exequendis Constitutionibus hætenus notatos defectus, obiter hìc attingere, & aliqua puncta veluti quædam specula, in quibus Fratres nostri, eosdem suos in regulari obseruantia defectus videre, illosq; quàm primû supplere, & corrigere studeât, proponere.



Constitutiones

PVNCTVM I.

*De defectibus in exequendis Constitutionibus  
presertim proximè præteriti Capituli Generalis  
ex parte Officialium & Fratrum in Con-  
uentu degentium.*

**D**VM pro debito muneris nostri officio (charitate fraterna id exigente) defectus eorum qui curæ nostræ commissi sunt, non confusionis, sed potius correctionis causa proponere volumus, à nobis ipsis (si quidem & ipsimet variis circumdati sumus infirmitatibus) incipere debemus. Et quamvis iam ab aliquot annis ex speciali Sedis Apostolicæ gratiâ, ad altiora Ecclesiæ & Reipublicæ munia vocati, & à regulari obseruantia votis essentialibus duntaxat exceptis) exempti simus; Officij tamen & ipsiusmet Professionis nostræ memores, in quantum infirmitas humana, & varia status nostri negotia patiuntur, in omnibus ad nos pertinentibus, Deo auxiliante, satisfacere pro viribus nostris conamur.

Quia verò inter alia, officium Præpositi Generalis concernentia puncta, in proximè præterito Capitulo descripta, illud quoque habetur, ut Bona ad mensam illius pertinentia, singulis trienniis semel per duos Consiliarios ad id deputatos visitentur,

Cap. Generalis Miechowien.

tentur, neque id hucusque, propter certa impedimenta, debitæ executioni demandatum sit; ideò, ne ulterius hæc Ordinatio nostra suo careat effectu, iam ex nunc duos viciniore Consiliarios, in Capitulo particulari deputandos, pro eo negotio quantocius expediendo, assignamus.

Iam verò quoad Custodis officium. Cum is (iuxta Constitutiones) & regularis disciplinæ, & cultus diuini in Ordine nostro director & moderator esse debeat, multum profectò momenti in eo positum est, ut pro hoc tam arduo officio, non nisi eiusmodi Frater eligatur, qui in eodem cultu diuino promouendo, & regulari disciplina retinenda, sit feruens & zelosus, & qui non tam spe priuati alicuius commodi, vel pinguioris Beneficij, sed ob Dei gloriam, & proximorum salutis amorem duntaxat, officio suscepto, omnibus omnia fieri velit, quiq; doctrinâ, pietate, cæterisque virtutibus instructus, viuum se omnibus præbeat bonorum operum exemplum. Quod si peculiari gratiâ Dei & beneficio talis Custos Conuentui obtigerit, diutius in eodem officio, donec vberiores laborum suorum protulerit fructus, detineatur, neque facile extra Conuentum ablegetur.

Cum autem, quò commodius omnia, tam in Ecclesia quam in Conuentu, debito modo atq; ordine

Lib. 2. Cap.  
Gen. 2.  
Const. 9.



### Constitutiones

dine peragantur, praesentia continua Custodis requiratur; volumus, ut Cultos quam rarissime se à Conuentu absentet: egressus verò (necessitate legitima id exigente) quantocius, praesertim verò in absentia R.D. Generalis, domum redeat. Praeterea attendat; ut Anniuersaria Defunctorum, similiter & aliae Benefactorum tam antiquae, quam recentiores Fundationes, suo tempore ad amussim expediantur, & in diuinis Officiis peragendis distributio Horarum à nobis antea praescripta, diligentius obseruetur.

Maiores quoque quam haecenus fuit, Custodis in Menstrua Cellarum visitatione requirimus diligentiam, quae eo potissimum fine fieri debet, ut superflua in visitatione deprehensa, citra vllum respectum, amoueantur, & indigentibus necessaria provideantur, neque aliqua in cellis priuatis arma asseruari permittantur: Quamobrem volumus, ut in posterum (iuxta antiquas Constitutiones) singularum Cellarum clauēs, praeter eas quas Fratres habent, semper penes se in Conclauī bene serrato asseruet, ac praeterea clausurae Conuentus diligentius deinceps attendat. Insuper, hoc vel maxime praecaveat, ne Capitula clamorose & contentiose, sed pacifice, & cum debita reuerentia tempore praescripto expediantur, turbatoribus verò statim in ipso sermonis initio silentium

Constit.  
De officio  
Custodis.

### Cap. Generalis Meechouien.

seuerè imponatur, neque illorum sententia attendatur, ingrauescente verò eorundem peruiacaci loquacitate, tales humi prostrati poenitentiam agant.

Quantum verò ad reliquos Fratres in Conuentu residentes attinet, multa profectò sunt in quibus ad ipsos Regula & Constitutiones negliguntur, quò fit, ut leuibus hinc in regulari obseruantia iactis fundamentis, ad loca particularia missi in Conuentu, facile postmodum in obliuionem Vocationis suae deueniant, neque debitae Superiorum suorum, penes quos pro tempore manent, correctioni subiaccere velint: Et quidem nonnulli inter cetera puritati conscientiae negliger student, eoque ipso pro frequentiore Missarum celebratione se ineptos reddunt, adeò, ut aliqui illorum, vix semel in septimana sacrificium Missae absoluant. Examini Conscientiae, tum & matutinae meditationi non omnes, neque vno atque eodem tempore (iuxta praescriptum Constitutionum) sed prout propria cuiusque voluntas est, vacent, silentium temporibus in constitutionibus assignatis, tam in Dormitorio, quam in Cellis, eo etiam tempore, quò ceteri Fratres examen Conscientiae faciunt, & se cubitum conferunt, non exactè seruant. Matutinum aliasque Horas aliqui frequenter, & ex mera negligentia, sub praetextu

Constit. De  
Officio o-  
mnium Fra-  
trum in  
Conuentu  
manentium.



### *Constitutiones*

infirmittatis, & quidem impune negligunt. In Chorum inferiorem, dum diebus festiuis Diuina peraguntur, tardius, nec omnes descendunt, neq; iuxta ordinem stala occupant, Extraneas personas sine scitu & facultate Superioris in cellas introducere, illisq; potum propinare, & cum iisdem confabulari præsument; Obuentiones pro administratione Sacramentorum, non Carbonistæ reddunt, sed sibimet vsurpant; Culpas proprias (iuxta præscriptum Constitutionum, & satis laudabilem aliarum Religionum morem) in Capitulo dicere erubescunt; Casum reseruatum habentes, non semper Superiorem pro impetranda, vel alicui deleganda absolutione adeunt, nec Ordinarij Confessarij operâ hac in parte vtuntur; Ad rixas & altercationes, imò aliquando etiam ad mutuas percussiones nonnulli prorumpunt, & quod omnium pessimum est, contra Superiorem etiam ipsum aliquando verbis parum decentibus insurgere, & contra illum, veluti quasdam conspirationes facere aliqui dissolutiores non verentur, cum tamen Custos si in aliquo (homo cum sit) delinquat, suum quoq; habeat Superiorem, à quo corrigi ac puniri possit; Otio quoq; aliqui ex iunioribus Presbyteris plus æquo indulgent, neq; libris intenti in Casuum ac Sacræ Scripturæ studio informantur, ac proinde eo ipso, tam ad

exci-

### *Cap. Generalis Metchouien.*

excipiendas Confessiones, quàm ad Sacras Concionem faciendas, parum apti existunt; Presbyteri item iam ab aliquo tempore laudabilem mensæ inseruiendi consuetudinem intermiserunt. A quibusdam etiam, pueri, sine expressa Superioris licentia, fouentur, & quod potius ex residuis mensæ pauperibus, vel familiæ Conuentus, obuenire deberet, ipsis impenditur. Hæc & alia his similia cum apertè Regulæ, Constitutionibus, & statui ac Professioni religiosæ repugnent, tanquam noxia & illicita præsentis Statuto damnamus, & ne in posterum eiusmodi abusus in Claustro reperiantur, seriò prohibemus, sub pœnis in Constitutionibus præfixis, aliisq; grauioribus pro ratione delicti arbitrio nostro irrogandis.

Vt autem cum in aliis Regularibus obseruantis, tum & in certis quibusdam & peculiaribus Ordinis, leiuniis iam à plerisq; Fratribus nostris in praxi haberi solitis vniformitas seruetur, certos leiuniorum Ordinis dies assignamus, nimirum S. Iacobi Apostoli in Maio, & S. Augustini Patriarcharum nostrorum vigilias, præterea tres dies Sabbatiuos, primam videlicet ante Dominicam secundam post Pascha, secundam ante Dominicam Pentecosten, tertiam ante Dominicam vltimam post Pentecosten. Deniq; pridie Diuisionis Apostolorum. Pro quibus sollennitatibus



## *Constitutiones*

Indulgentias, quæ non tantum Miechouienſi Eccleſiæ, verum etiam aliis nonnullis inſignioribus ad hanc noſtram pertinentibus inferuire poſſint, vnâ cum Confraternitate SS. Sepulchri quam primum Deo dante procurare intendimus.

### *PUNCTVM II.*

#### *De defectibus in exequendis Constitutionibus ex parte Beneficiatorum.*

**N**ON magna profectò opus eſſet defectuum in Ordine noſtro diſcuſſione, ſi vnusquiſque (prout per Dei gratiam aliqui faciunt) quid Deo, quid Religioni, & quid ſibi ſiue potiùs ſaluti & Conſcientiæ ſuæ debeat, paulò diligentius trutinaret, & pro virili vocationi atq; officio ſuo reſpondere curaret; Sed quia eſt ea noſtra imperfectio, vt plerumq; ad exteriora totaliter conuerſi, atq; adeò ſtatus & conditionis noſtræ obliti, interiorem hominem reformare negligenter ſtudeamus, vehementer ſanè dolemus, pleroſq; (vtinam verò nullus in poſterum ſit eiufmodi) Beneficiarios Ordinis noſtri reperiri, qui eo ipſo quòd extra clauſtrum generale degentes Beneficia Ordinis adminiſtrent, ſe à regulari obſeruantia liberos eſſe exiſtimant, Profeſſionisq; religioſæ parum memores, more ſecularium vitam agunt; Vnde etiam

## *Cap. Generalis Miechouien.*

am aliqui Religionis ſuæ habitum aſpernantes, ſeculari illoq; exquisito ſatis vtuntur, & ſine Cruce geminat a (quod præcipuum Religionis noſtræ inſigne eſt) in publicum prodire, vel illam de induſtria occultare non verentur. Nonnulli verò totos ſe planè dant ſeculari Oeconomix, Eccleſiaſticis verò occupationibus, & Cultui Diuino propagando, quæ illorum præcipua deberet eſſe cura vix aliquam temporis partem impendunt; Reditus ſuos, vel potiùs Eccleſiæ illius cui præſunt, magna ex parte (idq; iuxta beneplacitum ſuum) in profanos vſus conuertunt, neq; iuſtis de ſtriſta reſtitutionis obligatione ſcrupulis anguntur, cum tamen (iuxta Canonum & Conſtitutionum Ordinis præſcriptum) meri ſint reddituum Eccleſiæ ſuæ diſpensatores, atq; ad reddendam Superioribus ſuis quoties ipſi voluerint rationem obligati: Vicarios item curæ ac Conſcientiæ ſuæ commiſſos ad regularis diſciplinæ obſeruantiam, cum verbo, tum potiùs exemplo non incitant, neque ipſorum exceſſus (iuxta præſcriptum Conſtitutionum) puniunt, hoc ſolo contenti, ſi illi ſuas in Eccleſiaſticis muniis vices obeant, neq; ſe in adminiſtrationem rei Oeconomix impediunt, cum tamen ſalutis animarum præ cunctis aliis rebus potior ſemper ratio habenda ſit.

Non deſunt etiam aliqui (ſolitarij præſertim

Conſtit.  
De officio  
Præpoſitorum  
& Pa-  
rochorum,



Beneficiati nostri) qui partim ignaviâ impediti, partim etiam copia Confessarij destituti rarò admodum confitentur, & nihilominus tamen laxiore quadam conscientia, ad tremendum Missæ sacrificium accedere non verentur, obliti illius  
*Malach: 2.* Malachiæ 2. Sacerdotes dum accedunt ad altare sanctificentur, ne percutiat eos Dominus.

Præterea, Clausura respectu mulierum apud Beneficiatos (contra omnem Canonum & Constitutionum ordinationem) nullibi ferme in locis particularibus habetur, quæ licet exactè, in quibusdam præsertim locis, servari non possit, attamen moderatio ea de re in Constitutionibus proxime præteriti Capituli facta debitæ executioni commodè ubique locorum mandari & potest, & debet. Gnesnæ verò, Præuorsij, Stradomix ad Sanctam Hedwigim, ac etiam Lezaiscij (posteaquam ea fabrica, quàm Reuerendiss. Dominus modernus Præpositus summa cum laude & utilitate non tantùm Ecclesiæ, sed etiam Parochianorum suorum molitur) perfecta fuerit, vno aliquo iuxta portam (pro variis personis aduenientibus) hospitalio destinato, Clausura commodè observari potest.

Deniq; puncta ex Visitationibus cum per Nro ipsos, tum per Commissarios nostros Beneficiatis relicta pro executione, hucusq; (saltim quibusdam

dam in locis) in charta & non in effectu conspiciuntur. Quare ne quò maior est nostra hâc in parte conuiuentia, eò grauior Fratrum nostrorum in exequendis Superiorum suorum mandatis negligentia reperiatur, Volumus iam ex nunc in eiusmodi desides ac negligentes Constitutionum executores seriò animaduertere, eosdemq; iuxta præscriptum Constitutio, num cum aliis poenis, tum & ipsa Beneficiorum priuatione punire, ne amplius, & suam oneret conscientiam, & aliis dignioribus maiora pro Dei laude & Ecclesiæ, tum & Ordinis honore, & incremento præstandi adiutum & occasionem præcludant.

### PUNCTVM III.

*De defectibus in exequendis Constitutionibus ex parte Vicariorum, penes Beneficiatos degentium.*

**I**Nter alios Vicariorum in exequendis Ordinis Constitutionibus defectus, hi præcipuè, qui inferius recensentur, facile à quopiam notari possunt.

Atq; inprimis non mediocri reprehensione digni sunt, quod illi plerumq; alios se in Conuentu generali, alios verò in locis particularibus, in vita regulari & conuersatione exhibent, cum tamen  
 non



### *Constitutiones*

non locus, sed potius religiosa vita & mores. Claustrum ubiq; constituent. Quocirca, ne maior indies Vicariorum in exequendis Constitutionibus officium suum concernentibus negligentia appareat; Statuimus, ut quæ de ipsorum officio in Constitutionibus præscripta habentur, ab iisdem in posterum (sub pœnis in transgressores sancitis) integrè & totaliter adimpleantur, negligentes verò ac proterui, à Superioribus suis (quibus ipsi non minorem quam in Conuentu Custodi, in licitis & honestis, obedientiam & reuerentiam præstare tenentur) puniantur. In quo quidem nonnulli Superiores fortasse eo potissimum respectu hætenus negligentiores fuerunt, nedum inferiores punire volunt ab ipsis in vita vocationi religiosæ minus conformi taxentur. Quid enim mirum, si Vicarij in iis, penes quos pro tempore manent, zelum regularis disciplinæ non aduertentes, ipsi quoq; licentiosius viuunt, atq; eosdem vix pro superioribus agnoscant. Quod cum etiam communiter ex diuturniore Vicariorum in locis particularibus mansione euenire solet, Constitutionem antiquam de triennali in Vicariatu commoratione, debitæ executioni in posterum demandari omnino volumus; ita, ut neq; ipsi Custodi, neq; Beneficiato (præter expressam Reuendiss. Dñi Generalis facultatem) aliquem Fratrem

### *Cap. Generalis Miechouien.*

trem ultra præfixum tempus in Vicariatu detinere, vel ex vno loco in alium non expleto triennij tempore, sine legitima causa, transmittere deinceps licitum esse possit. Quæ quidem ordinatio nostra, ut eò efficacius ad effectum deduci possit, præcipimus P. Custodi, ut omnes eiusmodi Fratres, ultra triennium extra Conuentum in Vicariatu ad præsens residentes, quam primùm reuocari, alios verò idoneos in locum ipsorum substitui curet.

Accedit & illud, in quo pleriq; Vicariorum cespitant, & grauitèr miseri suas lædunt conscientias, quòd videlicet mulieres, cuiuscunq; status & conditionis sint, grauissimas Canonum & Constitutionum pœnas minimè veriti, in suas habitationes admittere præsumant, & eo ipso Censuris fortassis innodati non procurata priùs debita absolutione celebrare, & sacramenta administrare audeant, cum tamen nullam fermè iustam ac legitimam adeò enormiter delinquendi causam prætereundam possint: Quare ut tandem aliquando eiusmodi legum & Canonum transgressores (quicunq; illi reperiuntur) resipiscant, neq; se ignorantia, quam hætenus fortè ex leui aliqua occasione prætendebant, excusare possint. Beneficiatis nostris ubicunq; locorum existentibus seriò mandamus, ut si in quos, certè in hos laxiores,




### *Constitutiones*

res Conscientiæ Fratres serio animaduertant, & si contumaces fuerint, eosdem ad nos pro seueriori animaduersione absq; morâ deferant.

Quantum verò ad dispositionem rerum per Vicarios, proprio (vt ipsi aiunt) labore atq; industria comparatarum attinet, quoniam de iis (contra Constitutiones, & contra ipsam Paupertatis sanctæ naturam) iuxta arbitrium ac beneplacitum suum disponunt, multiq; notabiles pecuniæ summas (vt supra attigimus) corradunt, quas (vt intelleximus) in Conuentum reddituri, vel aliquibus extraneis personis mutuò dant, vel saltim ad tempus certum asseruandas tradunt, atq; ita quasi omni peculio destituti, communitatem in exigendis necessariis aggrauare non verentur, ideo, ne in posterum id fiat, ordinatio nostra ea de re supra in Capite secundo, Puncto quarto facta, vt omnino debitæ mandetur executioni sedulo attendemus, & illi contrauenientes seuerè puniemus. Reliqua verò, tam quoad debitam Sacramentorum administrationem, quam quoad Regularis disciplinæ obseruantiam spectantia, quia sufficienter in præteritis Constitutionibus expressa habentur, ea hîc toties repetere minus necessarium esse existimamus. Hoc tamen in summa ad veram Ordinis nostri restorationem serio requirimus, vt quæ in iisdem Constitutionibus sufficienter

### *Cap. Generalis Miechouien.*

sufficienter sancita habentur, Fratres nostri, citra omnem moram debitæ executioni mandent, omnesq; hos defectus & abusus in hocce Directorio siue Monitorio nostro veluti in speculo propósitos quantocius supplere curent, diligentes hac in parte à nobis paternam beneuolentiam, negligentes verò seueram animaduersionem relaturi, ac, quod maius est, DEO præpotenti grauissimam rationem suo tempore reddituri.



### *CAPVT SEXTVM.*

#### *De Oeconomix ordinatione.*

**E**T si potior semper ratio spiritualium quàm temporalium habenda sit, horum tamen duorum in vnaquaq; Republica tanta est conexio, ac subalternatio, vt vnum sine altero diutius stare non possit, illudq; ex huius recta dependeat administratione. Quod quidem cum alibi tum potissimum in Monasteriis & Religiosorum Conuentibus aperte videre est, vbi si res Oeconomica rectè ac debitè per officiales administratur, Regularis quoq; disciplina, Cultus diuinus, & cætera spiritualia vt plurimum florent, sin secus, omnia confundi ac perturbari est necesse,



## Constitutiones

atq; ita inter cætera eius rei incommoda, Paupertas Religiosa (quæ quemadmodum ex se nihil proprii admittit, ita etiam debitam ac sufficientem necessariorum prouisionem requirit) periclitatur, dum ea quæ ad communem victum & vestitum pertinent, vel indigentibus denegantur, vel in communi promptuario non habentur: Hoc autem cum non aliunde, nisi ex œconomis (prout supra capite secundo, puncto 3. attigimus) negligenter, officio suo fungentibus, proficiscatur, dum vel minus apti, & in re œconomica parum versati eliguntur, vel certè aptiores, & peritiores ex leui aliqua occasione facilè mutantur, aut saltem à non nullis Fratribus priuatis in officium alterius importune se ingerentibus, omniaque temerè improbantibus impediuntur. Idcirco ne eiusmodi disordinatio vterius in hac nostra Congregatione serpat, statuimus; vt iuxta antiquam consuetudinem & Constitutiones Ordinis, administratio rei Oeconomice non ad plures, sed ad solos, Custodem, Vestiarios, & Dispensatorem pertineat: ita tamen, vt Dispensator aptus & in re Oeconomica bene versatus, ac capitulariter electus in officio ad minus per triennium (nisi legitima aliqua causa aliter suaserit) detineatur, & hoc toto tempore suam fidelitatem, diligentiam, ac industriam, in administratione rei Oeconomice.

Const: de  
Officio  
Custodis.

## Capit. Generalis Mitehonien.

mice Communitati probare teneatur. Quod vt eò commodius facere possit (præsertim verò quò ad inspectionem prædiorum, ac sylvarum custodiam) loco Factoris vti poterit aliquo seruitore seculari, fidelitamen & honesto, qui exiguo aliquo stipendio contentus non extra sed in Conuentu maneat, & ab ipsius nutu & directione dependeat. Nihil etiam dispensator inscio vel inconsulto P. Custode faciet, sed frequentes cum illo vel (si necesse fuerit,) etiam cum Vestiariis de rebus ad œconomiam pertinentibus conferentiashabebit, nihilq; proprio motu, ex quo postea turbatio vel incommodum aliquod Conuentui oriri possit, attentare præsumet, ac præterea sedulo cauebit, ne subditi nouis & inluctis oneribus grauentur.

Vestiarij verò ita se gerant, prout in præteritis Constitutionibus de ipsorum officio præscriptum habetur, hoc solo addito, quòd cum ad ipsos tota planè necessariorum prouisio pertineat, ideoq; conseruatores domus vocentur, proinde eam in percipiendis & disponendis redditibus ad mensam Fratrum pertinentibus, rationem ini-re debent, vt tempestiue, (præsertim verò Decimis exactis & messe expedita) computatis computandis, ita expensa cum perceptis temperent, ac moderentur, quatenus pro certis necessariis,

Const: de  
Officio con-  
seruatorum  
domus.




### *Constitutiones*

vti bob9, piscibus, aromatibus, &c. certam quoq; pecuniæ quantitatem tempestiuè prouideant. Ac præterea pro aliis occurrentibus necessitatibus, semper in promptu pecuniam habeant. Quò fiet, vt neq; Decimæ anticipata solutione leuiore quam par est prætio vendantur, neq; æs alienum temerè contrahatur.

Porro cum in proximè præterito Capitulo Ducenti floreni pro Vestiaria, & floreni Centum pro Sacristia à nobis ex prouentibus mensæ nostræ assignati habeantur, & verendum sit, ne successoribus nostris, graue videatur, hanc summam ex priuato peculio singulis annis exolvere, consultius nos facturos existimamus, si loco eiusdem pecuniariæ summæ, Villam Iadovvnik cum prædio, à sexaginta propè annis à mensa Præpositi auulsam, & post duos annos locatione seu arenda Domino Alexandro Lugovvski expirante, ad dispositionem nostram redituram, Bonis aliis ad mensam Fratrum pertinentibus adiungamus, eamq; in vsum & administrationem iisdem tradamus, prout quidem hâc præsentī Constitutione nostra perpetuò tradimus, & eandem inter alias Monasterij villas iam exnunc annumeramus. Sed cum eiusdem villæ prouentus prædictam summam excedant, ex eisdem, præter florenos Trecentos superius specificatos, florenos Centum

### *Cap. Generalis Miechouien.*

Centum pro Medico in vsum Fratrum, alios autem florenos Centum pro Aduocato seu procuratore causarum, reliquum verò pro augmento Bibliotecæ, & pro minore Conuentus fabrica (si quidem Præpositus Generalis ad maiorem est obligatus) assignamus, prout ea de re in Priuilegio nostro exactius præscribitur.



### CAPVT SEPTIMVM.

#### *De Parochia Wagzouiensis ad Conuentum Miechouiensem Incorporatione, & de eiusdem dotatione.*

**Q**uantam Ordo hic noster iacturam, in Ecclesiis in Prouincia Russiæ consistentibus, per crebras Tartarorum incurfiones, magno cum dolore nostro, iam acceperit, & verendum sit ne maiores indies (quod DEVS auertat) accipiat, iam antea in præfatione nostra attigimus: Ad quam resarciendam, cum nulla commodior ratio ad præsens suppetat, quàm si in ijs partibus quæ ab hoc periculo per DEI gratiam sunt immunes, Ecclesiæ Ordini nostro adnexæ propagentur, libenter in eam cogitationem descendimus, vt Ecclesiam Wagzouiensem, in Diæcesi Gnesnensi consisten-



### *Constitutiones*

consistentem (quam vnâ cum Illustrissimo Domino Stanislao Lubienski Episcopo Luceoriensi Regniq; Vicecancellario Fratre nostro charissimo nuper ex latere cocto à fundamentis extructam in honorem DEI Omnipotentis, & in remedium animarum Maiorum nostrorum ibidem sepultorum nouis redditibus augere, & in ea quotidianam Officii Beatissimæ Virginis Mariæ Patronæ nostræ decantationem fundare intendimus) huic nostro Ordini incorporandam procuraremus, prout iam per DEI gratiam, consensum Regiæ Maiestatis tanquam vnici eiusdem Patroni ad eam rem obtinuimus, ibidemq; Mansionariam erigendam, & Præpositum cum aliquot Vicariis collocandum sine vlla procrastinatione destinamus. Interim autem dum & fabricam ad finem deducimus, & hanc dotationem procuramus, ne illa Ecclesia suo pastore careat, & debitis defraudetur obsequiis, iam ex nunc ibidem pro Commendario Reuerendum Patrem Maximilianum Iarochovvski destinamus, eidemq; in subsidium curæ animarum Presbyterum, sæcularem (in defectu ad præsens Fratrum Regularium) adiungimus, ac pro sustentatione vtriusq;, præter antiquos prouentus, eiusdem Parochiæ, ex censu florenorum septingentorum nuper per Nos empto, vnâ partem, aliam verò pro  
suppel-

### *Cap. Generalis Miechouien*

suppellectili domestica procuranda, & pro ædificiis Parochialibus perniciendis ad tempus assignamus, vberiore cum Illustrissimo Domino Vicecancellario Ordinationem de ea Ecclesia, quam primum per Nos fabrica eius & dotatio ad suum effectum plenè fuerit deducta, DEO dante, facturi.

Et si non dubitamus, labores hos nostros quos in condendis vtriusq; Capituli Generalis Constitutionibus, idq; pro maiore Ordinis huius incremento, suscepimus, non in cassum (Deo auxiliante, cessuros, quin potius Fratres nostros, iisdem, tanquam ipsimet Regulæ Canonibus & antiquioribus Ordinis statutis conformib; spontè ac liberaliter obtemperaturos; tamen ne quid ex parte nostra ad debitam earundem Constitutionum executionem, quam nos vel maximè intendimus, deesse videretur, maioris efficacæ atq; authoritatis causa, Confirmationem omnium & singulorum vtriusq; Capituli Statutorum, à sede Apostolica obtinuimus, eamq; ad calcem huius operis inferi curauimus. Cuius hic qui sequitur est tenor.

**H** **VRBA.**



Approbatio

VRBANVS. P.P. VIII.

**A**D futuram rei memoriam. *Militantis* Ecclesie regimini meritis licet imparibus diuina dispositione prepositi, ea que pro regularium personarum felici directione & gubernio provide sancita fuisse dicuntur, libenter, cum a nobis petitur, ut firmitus subsistant & exactius obseruentur Apostolicæ Confirmationis robore communimus, prout conficimus in Domino salubriter expedire exponi si quidem Nobis nuper fecit Venerabilis Frater Matthias Episcopus Chelmenensis Ordinis Canonorum regularium Custodum Sepulchri Dominici sub regula sancti Augustini, Prepositus generalis, quod in uno anno M. DC. XX. & altero anno M. DC. XXV. celebratis dicti Ordinis Capitulis Generalibus, nonnullæ constitutiones pro dictorum Canonorum felici regimine & gubernio editæ & sancitæ fuerunt, illasque pro maiori earum subsistentia, & obseruantia Apostolicæ nostræ Confirmationis

Cap. Generalis Miechouien.


mationis robore communiri plurimum desiderat. Nobisque propterea humiliter supplicari fecit, ut in premissis opportune providere de benignitate Apostolica dignaremur. Nos igitur dictum Matthiam Episcopum & Prepositum Generalem ac ipsius Ordinis Canonicos specialibus fauoribus & gratiis prosequi volentes, & illorum singulares personas a quibusuis excommunicationis, suspensionis, & interdicti, aliisque Ecclesiasticis sententiis, censuris, & penis a iure vel ab homine, quauis occasione vel causa latis, si quibus quomodolibet innodata existunt, ad effectum presentium dumtaxat consequendum, harum serie absoluentes & absolutas fore censentes, huiusmodi supplicationibus inclinati, Constitutiones huiusmodi, dummodo licite & honeste existunt, neque sacris Canonibus aut Concilii Tridentini decretis, dictique Ordinis regularibus institutis aduersentur, Apostolica auctoritate tenore presentium approbamus & confirmamus, illisque inuiolabilis Apostolicæ firmitatis robur adiungimus, ac om-



### Approbatio.

nes & singulos tam iuris quam facti defectus, si qui in iisdem interuenerint, supplemus. Decernentes, illas ac presentes literas semper validas, firmas & efficaces existere & fore, nec non ab omnibus dicti Ordinis Canonicis, alijsq; ad quos spectat inuiolabiliter observari, sicq; per quoscunq; iudices ordinarios & delegatos & causarum Palatii Apostolici Auditores, iudicari & definiri debere, ac irritum & inane, si secus super his à quoque quauis auctoritate scienter vel ignoanter contigerit attentari. Non obstantibus Constitutionibus & ordinationibus Apostolicis, & quatenus opus sit, dicti Ordinis etiam iuramento, Confirmatione Apostolica, vel quauis firmitate alia roboratis statutis, & consuetudinibus, ceterisq; contrariis quibuscunq; Datum Rome, apud sanctum Petrum sub Annulo Piscatoris die 14. Ianuarij M.DC. XXVI. Pontificatus Nostri Anno Tertio.

V. Theatinus.



## REGULA CANONICORVM RE- GULARIVM CUSTODVM SAN- CTI SEPVLCHRI DOMINI HIERO- solymitani, à D. Augustino con- scripta.



Ntenominia, Fratres Charissimi, diligam DEVS, deinde proximus, quia ista praecepta sunt principaliter nobis data. Haec igitur sunt, quae ut obseruetis, praecipimus in monasterio constituti. Primum, propter quod in vniuersis congregatis, vt vniuerses habitetis in domo Domini, & sit vobis anima vna, & cor vnum in DEO: & non dicatis aliquid proprium, sed sint vobis omnia communia. Et distribuatur unicuique à Praeposito vestro victus & regumentum, non aequaliter omnibus, quia non aequaliter valetis omnes, sed poti9 unicuique, sicut cuique opus fuerit. Sic enim legitis in actibus Apostolorum: Quia erant illis omnia communia, & distribuabatur unicuiq; sicut cuique opus erat. Qui aliquid habebant in saeculo, quando ingressi sunt monasterium, libenter velint illud esse commune. Qui autem non habebant, non ea quaerant in monasterio, quae nec fo-



### *Regula Custodum*

ris habere potuerunt. Sed tamen eorum infirmitati, quod opus est, tribuatur, etiamsi paupertas illorum, quando foris erant, nec ipsa necessaria poterat inuenire. Tantum non ideo se putent esse felices, quia inuenerunt victum & tegumentum, quale foris inuenire non poterant: nec erigant cervicem, quia sociantur eis, ad quos foris accedere non audebant; sed sursum cor habeant, & terrena ac vana non quærant, ne incipiant esse monasteria diuitibus utilia, non pauperibus, si diuites illic humiliantur, & pauperes illic inflantur. Rursus etiam illi, qui aliquid esse videbantur in sæculo, non habeant fastidio fratres suos, qui ad illam sanctam societatem ex paupertate venerunt. Magis autem studeant non de parentum diuitum dignitate, sed de pauperum fratrum societate gloriari. Nec extollantur, si communi vitæ aliquid de suis facultatibus contulerunt: nec de suis diuitiis magis superbiant, quia eas monasterio partiuntur, quàm si eis in sæculo fruerentur. Alia quippe quæcunque iniquitas in malis operibus exercetur, ut fiant: superbia verò etiam bonis operibus insidiatur, ut pereant. Et quid prodest dispergere dando pauperibus, & pauperem fieri, cum anima misera superbior efficitur diuitias contemnendo, quàm fuerat possidendo? Omnes ergò vnanimiter & concorditer viuite, & hono-

### *S. Sepul. Hierosolymit.*

& honorate in vobis Deum inuicem, cuius templa facti estis.

Orationibus instate, horis & temporibus constitutis. In Oratorio nemo aliquid agat, nisi ad quod factum est, vnde & nomen accepit: ut si forte aliqui etiam præter horas constitutas, si eis vacat, orare voluerint, non eis sint impedimento, qui ibi aliquid agendum putauerint. Psalmis & hymnis cum oratis Deum, hoc versetur in corde, quod profertur in voce. Et nolite cantare, nisi quod legitis esse cantandum. Quod autem non ita scriptum est, ut cantetur, non cantetur. Carnem vestram domate ieiuniis, & abstinentia eicæ, & potus quantum valetudo permittit. Quando autem aliquis non potest ieiunare, non tamen extra horam prandij aliquid alimentorum sumat, nisi cum ægrotat. Cum acceditis ad mensam, donec inde surgatis, quod vobis secundum consuetudinem legitur, sine tumultu & contentionibus audite, nec solæ vobis fauces sumant cibum, sed & aures, esuriant verbum DEI. Qui infirmi sunt ex pristina consuetudine, fraliter tractantur in victu, non debet aliis molestum esse, nec iniustum videri eis, quos fecit aliqua consuetudo fortiores. Nec illos feliciores putent, quia sumunt, quod non sumunt ipsi; sed sibi potius gratulentur, quia valent, quod non valent illi. Et  
si eis



si eis qui venerunt ex motibus delicatioribus ad monasterium, aliqui alimentorum, vestimentorum, operimentorum datur, quod ab his fortioribus, & ideo felicioribus, non datur, quantum de sua seculari vitâ illi ad istam descenderint, quamvis usque ad aliorum, qui sunt corpore firmiores, frugalitatem peruenire nequiverint. Nec debent velle omnes, quod paucos vident amplius, non quia honorantur, sed quia tolerantur, accipere: ne contingat detestanda peruersitas, ut in monasterio, ubi quantum possunt, sunt diuites laboriosi, fiant pauperes delicati. Sanè quemadmodum ægrotantes necesse habent minus accipere, ne grauentur; ita & post ægritudinem sic tractandi sunt, ut citius recreentur, etiam si de humillima sæculi paupertate venerint, tanquam hoc illis contulerit recentior ægritudo, quod diuitibus anterior consuetudo. Sed cum vires pristinas reparauerint, redeant ad feliciorē consuetudinem suam; quæ famulos DEI tantò amplius decet, quantò minus indigent: nec ibi eos teneat voluptas iam vegetatos, quos necessitas aliquando leuârat infirmos. Illos æstimant ditiores, qui in sustinenda parcitate fuerint fortiores: melius est enim minus egere, quàm plus habere. Non sit notabilis habitus vester, nec affectus vestibus placere, sed moribus. Quando præce-

ditis

ditis, simul ambulate; cum veneritis, quò itis, simul stete. In incessu, statu, habitu, in omnibus motibus vestris nihil fiat, quod cuiusque offendat aspectum, sed quod vestram deceat sanctitatem. Oculi vestri etsi iaciuntur in aliquam foeminarum, figantur in nulla. Neque enim quando proceditis, foeminas videre prohibemini; sed appetere, aut ab ipsis appeti velle, criminofum est. Nec solo tactu & affectu, sed aspectu quoque appetitur & appetit concupiscentia foeminarum. Nec dicatis vos habere animos pudicos, si habeatis oculos impudicos: quia impudicus oculus, impudici cordis est nuncius. Et cum se inuicem sibimet, etiam tacente lingua, conspectu mutuo, corda nunciant impudica, & secundum concupiscentiam carnis alterutro delectantur ardore, etiam intactis ab immunda violatione corporibus, fugit castitas ipsa de moribus. Nec putare debet, qui in faminam figit oculum, & illius in se ipse diligit fixum, ab aliis se non videri, cum hoc fecerit: videtur omnino, & à quibus se videri non arbitratur. Sed ecce lateat, & à nemine hominum videatur, quid faciet de illo desuper inspectore, quem latere nihil potest? An ideo putandus est non videre, quia tantò videt patientius, quantò sapientius? Illi ergo vir sanctus timeat displicere, ne velit foeminae malè placere. Illum cogitet omnia videre, ne ve-



### *Regula Custodum*

ut scēminam malē videre. Illi<sup>9</sup> namque & in hac  
caussa commendatus est timor, vbi scriptum est  
Abominatio est Domino defigens oculū. Quan-  
do ergo simul estis in Ecclesia, & vbiunque, vbi  
scēminæ sunt, inuicem vestram pudicitiam custo-  
dite. Deus enim qui habitat in vobis, etiam isto  
modo custodiet vos ex vobis. Et si hanc, de qua  
loquor, oculi petulantiam in aliquo vestrum ad-  
uerteritis, statim admonete, ne cœpta progredia-  
tur, sed de proximo corrigatur. Si autem & post  
admonitionem iterum, vel alio quocunque die,  
id ipsum eum facere videritis, iam velut vulnera-  
tum, sanandum prodat, quicumque hoc potuerit  
inuenire, prius tamen & alteri vel tertio demon-  
stratum, vt duorum vel trium possit ore convin-  
ci, & competenti seueritate coerceri. Nec vos iu-  
dicetis esse maleuolos, quādo hoc indicatis. Ma-  
gis quippe innocentes non estis, si fratres vestros,  
quos indicando corrigere potestis, tacendo peri-  
re permittitis. Si enim frater tuus vulnus haberet  
in corpore, quod vellet occultari, cum timeret se-  
cari: nonne crudeliter ab se sileretur, & miseri-  
corditer indicaretur? Quāto ergo potius debes  
manifestare, ne deterius putrescat in corde? Sed  
antequam aliis demonstretur, per quos convin-  
cendus est si negauerit, prius Præposito debet  
ostendi, si admonitus neglexerit corrigi, ne forte  
possit secretius correptus non innotescere cete-  
ris. Si

### *S. Sepul. Hierosolymit.*

ris. Si autem negauerit, tunc neganti adhibendū  
sunt alij, vt iam coram omnib<sup>9</sup> possit non ab vno  
teste argui, sed à duob<sup>9</sup> vel tribus conuinci. Con-  
uictus verò secundum præpositi vel etiam Pres-  
byteri, ad cuius dispensationem pertinet, arbitri-  
um, debet emendatoriā subire vindictam: quam  
si ferre recusauerit, etiam si ipse non abscefferit,  
de vestra Societate proiciatur.

Non enim & hoc fit crudeliter sed misericor-  
diter, ne contagione pestifera plurimos perdat.  
Et hoc quod dixi de oculo non figendo, etiam in  
cæteris inueniendis, prohibendis, indicandis,  
conuincendis, vindicandisque peccatis, diligen-  
ter & fideliter obseruetur, cum dilectione homi-  
num, & odio vitiorum. Quicumque autem in tan-  
tum progressus fuerit malum, vt occultè ab ali-  
quo litteras vel quodlibet munus accipiat, si hoc  
vltro confitetur, parcatur illi, & oretur pro illo.  
Si autem depræhenditur atque conuincitur, se-  
cundum arbitrium Presbyteri vel Præpositi gra-  
uius emendetur. Vestes vestras in vnum habea-  
tis, sub vno custode vel duobus, vel quot suffice-  
re potuerint ad eas excutiendas, ne à tinea lædan-  
tur. Et sicut pascimini ex vno cellario, sic indua-  
mini ex vno vestiario. Et si fieri potest, non ad  
vos pertineat, quod vobis indumentum pro tem-  
porum congruentia proferatur, vtrum hoc reci-  
piat vnuiquisque quod deposuerat, an aliud,  
quod



*Regula Custodum.*

quod alter habuerat, dum tamen unicuique, prout cuique opus est, non negetur. Si autem hinc inter vos contentiones & murmura oriuntur, cū queritur aliquis deterius se accepisse, quam prius habuerat, & indignum se esse, qui non ita vestitur, sicut alius frater eius vestiebatur, hinc vos probate, quantum vobis desit in illo interiore sancto habitu cordis, qui pro habitu corporis litigatis. Tamen si sic vestra toleratur infirmitas, ut hoc recipiatis quod deposueratis, in vno tamen loco sub communibus custodibus habete, quod ponitis. Ita sanè ut nullus sibi aliquid operetur, sed omnia opera vestra in vnum fiant, maiori studio & frequentiori alacritate, quam si vobis singulis faceretis propria. Caritas enim de qua scriptum est, quod non querat quæ sua sunt, sic intelligitur, quia communia propriis, non propria communibus anteponeat. Et ideo quanto plus rem communem, quam propria vestra curaueritis, tanto vos amplius profecisse noueritis: ut in omnibus, quibus vititur transitura necessitas, superemineat, quæ permanet, caritas. Consequens ergo est, ut etiam, qui suis filiis, aut aliqua necessitudine ad se pertinentibus in monasterio constitutis aliquā contulerit vestem, siue quodlibet aliud inter necessaria deputandum, non occultè accipiatur, sed sit in potestate Præpositi, ut in rem communem redactum, cui necessarium fuerit, præbeatur.

Quod

*S. Sepul. Hierosolymit.*

Quod si aliquis, rem sibi collatam celauerit, furti iudicio condemnatur. Indumenta vestra secundum arbitrium Præpositi lauentur, siue à vobis, siue a fullonibus, ne interiores animæ sordes contrahat munda vestis nimius appetitus. Lauacrum etiam corpori cum infirmitatis necessitas cogit, minimè denegetur. Fiat sine murmure de consilio medici, ita ut etiam si nolit, iubente Præposito faciat, quod faciendum est pro salute. Si autem velit, & forte non expedit, suæ cupiditati non obediatur. Aliquando enim etiam si noceat, prodesse tamen creditur, quod delectat. Denique si latens est dolor in corpore, famulo Dei dicenti, quid sibi doleat, siue dubitatione credatur. Sed tamen utrum sanando illi dolori, quod delectat, expediat, si non est certum, medicus consulatur. Nec eant ad balnea, siue quocumque ire necesse fuerit, minus quam duo vel tres. Et ille qui habet aliquod eundi necessitatem, cum quibus Præpositus iusserit, ire debet. Agrotantium cura siue post agritudinem reficiendorum, siue aliqua imbecillitate etiam, siue febribus laborantium, vni alicui debet iniungi, ut ipse de cellario petat, quod cuique opus esse perspexerit. Siue autem qui cellario, siue qui vestibibus, siue qui codicibus præponuntur, sine murmure seruiant fratribus suis. Codices certa hora singulis diebus petantur: extra horam qui petierit, non accipiat. Vesti-

menta



*Regula custodum*

menta vero & calceamenta quando indigentibus fuerint necessaria, dare non differant, sub quorum custodia sunt, quæ poscuntur. Lites aut nullas habeatis, aut quam celerrimè finiat, ne ira crescat in odium, & trabem faciet de festuca, & animam faciat homicidam. Sic enim legitis: Qui odit fratrem suum, homicida est. Quicumque conuicio vel maledicto, vel etiam criminis obiectu aliquem læsit, meminerit satisfactione quantocius curare, quod fecit, & ille qui læsus est, sine disceptatione dimittere. Si autem inuicem se læserint, inuicem sibi debita relaxare debebunt, propter orationes vestras: quas utique quanto crebriores habetis, tanto saniores habere debetis. Melior est autem qui quamuis ira sæpè tentatur, tamen impetrare festinat, ut sibi dimittat, cui se fecisse agnoscit iniuriam: quam qui tardius irascitur, & ad veniam petendam tardius inclinatur. Qui non vult dimittere fratri, non speret accipere orationis effectum. Qui autem nunquam vult petere veniam, aut non ex animo petit, sine causa est in monasterio, etiamsi inde non proiciatur. Proinde vobis à verbis durioribus pareite, quæ si emissa fuerint ex ore vestro, non pigeat ex ipso ore proferre medicamenta, vnde facta sunt vulnera. Quando autem necessitas disciplinæ in moribus coercendis dicere vos verba dura compellit, si etiam ipsi modum vos excessisse sentitis,

non

*S. Sepul. Hierosolymit.*

non à vobis exigitur, ut à vobis subditis veniam postuletis, ne apud eos quos oportet esse subiectos, dum nimium seruetur humilitas, regendi frangatur autoritas. Sed tamen petenda est venia ab omnium Domino, qui nouit etiam eos, quos plus iusto forte corripitis, quanta beneuolentia diligatis. Non autem carnalis sed spiritualis inter vos debet esse dilectio. Præposito tanquam Patri obediatur, multo magis Presbytero, qui omnium vestrum curam gerit. Ut ergo cuncta ista seruentur, & liquid seruatum minus fuerit, non negligenter prætereatur, sed ut emendandum corrigendumque curetur, ad Præpositum præcipue pertinebit, ut ad Presbyterum, cuius est apud vos maior autoritas, referat quod modum vel vires eius excedit. Ipse vero qui vobis præest, non se existimet potestate dominante, sed caritate seruiente felicem. Honore coram vobis prælati sit vobis, timore coram DEO substratus sit pedibus vestris. Circa omnes se ipsum bonorum operum præbeat exemplum. Corripiat inquietos, consoletur pusillanimes, suscipiat infirmos. Patiens sit ad omnes, disciplinam libens habeat, metuendus imponat.

Et quamuis vtrumque sit necessarium, tamen plus à vobis amari appetat, quam timeri: semper cogitans DEO se pro vobis redditurum esse rationem. Vnde vos magis obediendo, non solum

vestri,



**Regul. Cust. S. Sepul. Hierosolymit.**

vestri, sed etiam ipsius miseremini, quia inter vos  
quantom loco superiore, tantom in periculo maiore  
versatur. Donet Dominus, vt obseruetis hac om-  
nia, tanquam spiritualis pulchritudinis amatores,  
& bono Christi odore de bona conuersatione fra-  
grantes, non sicut serui sub lege, sed sicut liberi  
sub gratia constituti. Vt autem vos in hoc libel-  
lo, tanquam in speculo possitis inspicere, ne per  
obliuionem aliquid negligatis, semel in septima-  
na vobis legatur. Et vbi vos inueneritis, ea qua  
scripta sunt facientes, agite gratias Domino bo-  
norum omnium largitori. Vbi autem sibi qui-  
cunque vestrum videt aliquid deesse, do-  
leat de praeterito, caueat de futu-  
ro, orans, vt & debitum dimit-  
tatur, & in tentationem  
non inducatur.

**A MEN.**





